

河南府志卷之九十二

藝文志十六

墓誌銘三

附祭文

監察御史閻禹錫墓誌

明 白良輔

道無二致學本一家自章句科舉之學與性理之學判爲二途學既爲二則心之於道也不能無隱顯之異其於文也亦不能無純疵之別况措諸事爲能無公私大小哉秦漢而下儒之明斯道也鮮矣吾洛自程氏兄弟倡學之後僅見閻先生子與一人先生天性穎悟日記數萬言父諱端贈監察御史永樂丁酉中河南鄉選第一官教諭卒有賢聲母王氏贈

太孺人姚姚慈惠先生本家庭之訓惟恐自失余少與之友
獨許其讀易能知四尚之旨可傳聖賢之道故六經之言賴
之以明一時鄉士子弟亦因得所啟迪焉先生字子與一字
有賜領正統甲子鄉薦走事河汾薛文清公瑄俊明古今散
同之言合爲一家正大之論乃採集諸儒論易得失而裁正
成書目曰周易詳說集晦菴要語編次二程文集太極圖有
說孫武子有解上而天文有以究其隱顯下而地理有以燭
其幽明讀天下古今之書悟紀綱造化之妙闢異端息邪說
尤其首事也先生之道如江漢浩浩無涯隨流而皆盈司訓
乎昌黎開州也振鐸有方贊錄乎太學也循循不怠尋陞國

子監丞重抑奔競左遷徽州經歷大段濠祀庚辰大臣交薦
天子詔爲監察御史領北直隸提學事先生益以忠肅修於
中以文術昭於外推經旨以飭吏事本法理以平人心及手
訂太極圖說板行以示諸生蓋欲學者知萬物各具一理萬
物同出一原而不可徒事乎章句也歷官中外二十餘年仕
不忘學士大夫出自門墻有聲者濟濟焉兼前後建明時政
累千萬言雖一時忤朝議外補旋即詔還先是丁太孺人憂
廬墓側哀毀者三年有白蟻穴聚之應有司以上聞詔旌其
門先生素無恙一旦以痰症卒於官實成化十二年十月二
十八日也年五十有一卒之日含具歛襲悉資之都里公卿

大夫車馬弔送遠近弟子奔走會哭者莫不失聲配馮氏封

孺人子四曰效鴻書木木爲郡庠弟子員女二長適太學生

畢宗義次與孫女俱在室孫男二茂龍尚在齟齬嗚呼先生

之學精深性理道本孝弟充周而無窮惜乎天奪之壽位不

稱德澤不大施識者恨之曰天乎何斯人而止於斯乎其子

效等謀擇日歸塋耐之先塋卽山之麓前刑部員外郎薛襪

進士喬縉重述先生之行實以良輔爲知先生深各以狀屬

余故爲摭先生行實之大者用刻諸石誌諸墓以詔後人

舊志

兵部尚書贈太子少保諡襄毅王公墓誌銘

明郭朴

嘉靖辛酉十二月十三日協理京營戎政兵部尚書王公
疾卒于位計聞上震悼下禮官議卹典贈公太子少保諡襄
毅遣行人護其喪歸葬河南勅有司營葬域賜諭祭自始喪
至封塋凡幾壇蓋公以忠勤受知上久故恩禮特隆異焉先
是庚戌鹵乘塞堙之不戒直闖近郊羣議大擾上歷選在廷
大臣可以批糾紛持大計者公遂以吏部左侍郎巡視九門
迺疏五事以請陳營兵郭外啟門納四郊避寇者城中嚴兵
內城諸門示威壯已而署兵部政提團營又上六議極論營
務積衰之弊與作新之宜上皆采納更十二營曰三大營設
文武大臣各一總其事又設副將以下若干員俱以邊將選

而戎政駸駸然改觀聽矣上益知公才任大用遂特命公爲兵部尚書于是中外皆屬目公公亦以安危爲己任乃條陳安攘十二事會咸寧侯仇鸞者提邊兵入衛虛聲矜喝以罔功要寵因而主戎政勢張甚睚眦朝者間獨不便公鸞欲節制九邊總兵公不可鸞欲變易邊將公不可鸞欲罷築薊鎮邊垣公又不可鸞積不能平當是時百司患鸞桀驁見公如是咸爲朝廷喜而諸厚愛公者咸爲公危公曰鸞禍心且不測吾大臣自惜將如國計何因上書訟言攻之不旬月竟爲鸞所中去位公去鸞益橫未幾殛死上乃思公言且念其戡定功不置庚申協理京營戎政員缺上曰叅戎重寄非王邦

瑞不可乃詔卽其家起之蓋自辛亥至是且十年其爲上所眷憶如是故其卒也尤軫痛之而贈卹有加焉公諱邦瑞字惟賢別號鳳泉河南宜陽人也敏惠溫方凝靜不苟識量宏遠視天下事無一不可爲應機立斷而張弛必中要以久暫鮮毫髮出入者言擇可而發平居退然若不出諸口至臨大節建大議衆所喁喁挺然諍之而不疑蓋古之所謂剛毅人也弱冠舉進士改翰林院庶吉士居父憂起復授廣德知州祖喪去職補滁州有材賢聲陞南京刑部員外郎南京吏部文選郎中陝西按察司僉事提督學校以註誤謫山東濱州知州復陞陝西按察司僉事分巡關內道平反八年寃獄人

稱神明陞本司副使整飭固原兵備居祖母憂復補陝西按察司副使提督學校士喜其再至益興於學陞陝西布政司叅政丁母憂服闋陞都察院右僉都御史巡撫寧夏在任二年餘陞南京大理寺卿兵部右侍郎改吏部右侍郎轉左侍郎庚戌陞今職公幼穎拔九歲知文自始學至終老無故未嘗一日釋卷性尤喜觀史道及古今之務禮典法制兵賦沿革繁畧之變歷歷如指掌其爲文能發心所欲言者頃刻數千言立就而俊辯可觀初以才選儲禁林迨守三州按北地所至必以教化爲務至以其俸入易經史百家之言貯之學宮視學政時則又剏正學書院其性尚固然也其爲政雖和

易坦直至於鉤校欺漏剗剗豪黠又不爲一切恩貸如廣德之豪夏姓滁州指揮徐爵及涇陽之孽令張某者寧廷臺臣之意雖反三不爲移判故所至肅然憚而去後則復見思自少倜儻負竒總非爲諸生屬山東盜起卽上安剿十四事河南守河南守喈曰異哉洛陽少年迺爾竒絕耶及兵備固原屬松石劉公視西師劉公固自偉人見公大加器重延之幕府每事朝夕諮詢詳安夏錄中時涇邠巨盜李孟春等流劫河東河西東西莫之撓也公至則芟夷之無遺類民用大靖公初以文行吏治有名其以武畧顯自茲始迨寧夏益著寧夏介在河曲三隅逼寇烽火貫四時歲爲常公旣內治嚴又

能招攜鹵黨刺鹵中事甚悉每有先事備鹵嘗乘冰一入輒
失利遺其首而去去不敢輒近塞者終公之日西人語保障
功者前後多稱公故庚戌之變衆籍籍惟公是賴上以僉謀
用公用則有竒偉績特注念焉其嚮用公銳甚而公遽不起
生於宏治八年五月十九日享年六十有七先世山西夏縣
人自其高祖貴始徙宜陽曾祖璘華亭縣丞祖臣壽官父謨
贈奉政大夫南京文選司郎中母屈氏封太宜人皆以公貴
公內行純備事親養致敬喪致哀凡冠婚葬祭咸稽諸禮爲
鄉人所宗公初配冀氏封宜人繼配李氏封孺人子男五人

正國登進士歷都給事中通政司叅議正直縣學生正方正

大正修女六人長適庠生李時聘次適按察司僉事溫如春
次適舉人吳三聘次適庠生蔡承進次適舉人許佃一幼未
字孫男一隨麟女一許字劉紹第叅議君卜以壬戌十二月
二十日塋公泰山勅建新兆與冀宜人同窆乃以少宗伯高
公狀徵余銘銘曰

節矣嵩岡其下維洛翊運降神哲人是作馭電鞭虹雄飛域
中秋嶮孤拔朝旭冲融公在邊陲爲國貔虎野不告烽士歌
于伍公在朝廷爲國釣石殿彼捭攘藉之衽席帝簡康猷本
兵是崇繫惟旦夕百載之功帝念舊德咨爾保釐豈不遐遠
十年之思方駕通莊中道而息都人皇皇帝心載惻爾祀爾

域爾贈爾諡天寵則多赫于有位維公之純誠維帝之明祚

萬年不斲視此刻銘

郭文簡文集

戶部侍郎贈尚書諡恭敏董公墓誌銘

明

王正國

萬歷壬辰春正月二十一日戶部左侍郎董公卒於洛計聞
上愍悼賜諭祭勅有司營葬域悉如禮先是公撫甘鎮念母
太淑人在洛乞歸不許陞南少司空會闕邊使薦公軍功蒙
恩賚白金文綺加贈封二代時太淑人年及耄公殫將遠再
疏陳情特允侍養居四載太淑人以壽終公請卹予祭塋哀
毀三年方禫聞南少司徒之命公疏辭不獲抵任不幸長嗣
春元病歿官舍公過慟引疾又不獲強起視事握筭布條督

理負餉給于額勞瘁增劇時國計告匱廷議借公籌改戶部
右侍郎尋陟左公取道還里冀攝起圖後効而醫竟罔功惜
哉公諱堯封字淑化別號李村先世河南裕州人五代祖諱
成徙洛陽占籍高祖福曾祖奉散官祖志道父智祖父俱贈
南京工部右侍郎祖母殷氏贈淑人母陳氏累封太淑人公
以嘉靖丁亥十二月二十九日生陳夢有鳳降於庭稍長則
端穎不凡八歲授易輒了大義二十舉於鄉太守楊公額其
門曰洛陽才子癸丑成進士筮仕廬州府推官卓有明恕聲
諸臺剡薦絜二十餘考最得馳封二尊人丁已徵爲山東道
監察御史始巡宣大邊已按四川父憂奔里起按順天晉光

祿再按蘇松奉簡使者五成挺然以振肅風紀自任如宣大
總督王某兵備路某侵軍儲入賂張公首劾罷之尤條草犬
平宴等六事以善其後入蜀會撫臣以督責三殿大木過急
地方騷動爲亟疏其苦狀而先請擇人任事其困始甦及癸
亥初冬辛愛把都兒入犯郊圻肅廟震驚且夕倚公密疏以
爲安事寧有失事叅將馮某以善結中璫得從輕典卽上杜
欺玩等六事又上計處邊儲等六事併督修畿輔壕城五事
咸當主心而中機宜一時臺名藉甚肅廟知公以此而簡臯
蘇松有自也始蘇松投靠積弊日鉅不可解貧斃苦無告向
稱爲難差公至悉正以法復調停入議宿蠹以清旋兌糧志

倉議興謂便軍也而民情洶洶公力陳其不可者十議定民
與軍迄兩便之又發織造中官趙某貪冒弊因勸上停中使
上信公乃罪中官自是無復遣者華亭徐文貞公每稱數三
吳名巡必首公曰真御史真御史然觸忌多已隆慶戊辰以
望陞太僕寺少卿明年京考卒中忌調山西按察副使備兵
冀南士論詘之公坦然執憲度不少挫庚午春陞本省叅政
是秋還貳太僕益絕請託清牧圉罔政改觀萬歷壬申陞南
京操江右僉都御史公憤操務久弛不足爲留都重躬勤選
練治艦裕儲隨上江防數事振刷之嚮用方銳無何執政賺
其不附已撫蕪湖盜事論調夫小竊註大吏非例且釋其主

者而以罪公時事可知已公歸洛日以色養課子爲事出偕
同儕舉惇誼社間則行樂城西園若將終焉園故闢於太淑
人後公予寧構永思堂於其中時稱其孝歸八年江陵相劾
上用言官薦補公浙江叅議未行陞應天府丞任三月復陞
僉都御史巡撫甘肅孤懸河西舊渺寇巢一切兵食視諸鎮
獨減近敵衆駐牧踰三十部落而處堂玩備如故公至大駭
念繫全陝阨塞亟上要議五事而又廣斥堠增芻餉時簡閱
一振積玩凜若驚在旦夕者逾年秋外寇切進台吉等果大
舉入犯賴公夙備一無所掠而遁迄公任五郡宴然故薦者
以爲曲突之功優於血戰而恩予甚渥焉比去鎮軍民遮道

擁泣謂奪我干城不二年河西大闕至厓宵旰特遣重臣經
畧歷歲始寧廟堂益服公先謀云公居常痛封公棄養早遑
遑將母愛日愈篤以故司空不與易而司徒之擢也時以耆
舊爲朝紳所推轂上柄用正亟遽至此深可爲世道惜也公
才誠兩至通不毀方貞不絕俗識度曠夷論事不執我見而
臨機任重屹不可奪持已貴而能下遇里夫小吏咸有禮惠
及三族扶危周窘往往不厭官四十年矢清白不囊橐計病
將革會諸姻出其篋蕭然圖書百數種爾嗚呼世有甫一命
而厚自封殖者視公何如哉卒之日闔郡悲嘆恠無天道壽
六十有六嘗攷漢陽尊畏道叱馭事竊疑兩君子者雖能各

行其志寧免一節自命今公忠事三朝表豎宏鉅更以膚功
顯親終養致孝卽才蘊未盡究而大節炳然兼著校兩君子
有侈稱焉豈非士林之所難哉噫鳳徵不虛已元配張氏累
贈淑人繼劉氏吳氏累封淑人男五獻策已酉舉人卒娶陳
氏評事綺女對策郡庠生娶劉氏憲使贊女張出定策聘余
甥袁氏知府桂蔡女延策聘余弟舉人正修女揆策聘李氏
員外郎根女吳出孫男二玉生金生俱幼女四婿庠生呂乾
生方可教史洛溫廷杞俱獻策出對策卜以癸巳二月十七
日厝公勅建上店里原先塋之次啓張劉二淑人耐而以公
治命奉憲使劉公狀屬余銘嗟乎余忍銘公哉顧余與憲使

與公皆知自其髫年且同舉而互有姻好者安忍不銘銘曰
矯矯鳳靈朝陽儀庭言中國經代天五狩冠豸服繡澤流宇
宙直道難容中外錯庸厥職惟共帝曰忠良畀汝甘涼壯我
邊疆旄鉞所指窮廬遠徙野無虎兇勲勞徹帝司空宣制寵
褒三世愛日陳情萬鍾是輕孝莫與京九重側席登延耆碩
丰采赫奕借籌兩都烏履司徒望重公孤龍蛇兆歲哲人長
逝邦家隕涕帝心載惻愍綸優特哀榮兼得維印崔巍維公
全歸勒銘獻猷萬年德輝

舊志

方山邱公墓誌銘

明
孟化鯉

隆慶辛未冬十月六日方山邱公卒先是化鯉造請公坐談

終日登山歌嘯且期我師西川尤先生于洛西商數年所得無恙也曾幾何時而訃至於虜哲人已矣鄉邦失耆舊同志失法程傷哉公諱鳳字鳴岐其先山西翼城人元末諱仲德者徙河南之新安仲德生聚聚生貴貴生志興志興四子公其仲氏也公世業農弱冠爲憲司吏聞天台陳先生風毅然以效法古人爲志衛指揮某罪當落職賂公求解公峻色以却當途重之名震河洛嘉靖戊戌謁選丁外艱旣服闋以母老不欲出且十載值尤先生乞養歸造廬相訪促膝論道月餘而後返慨然曰古人也自歎不及因贈言勸之出而公母氏亦卒公乃以庚戌拜獻縣丞敬上愛下事雖至瑣罔不恪

恭持已嚴毫無所染卽古劉伯榮吳處默之廉何加焉鄉大
夫劉公某贈以詩有門掩苔花依舊貧之句少司徒玉泉陳
公瓚時爲侍御每稱于人曰卽丞吾師表也誠重之矣馬院
徐公按河間欲得屬吏最廉者風郡邑以問陳推府麟且令
毋拘資格陳素重公遂以公對而見吾陳公大賓爲郡守尤
重公屢薦之丙辰轉南京龍驤衛經歷見吾公致贖縣令爲
設供具皆固辭去之日一馬一僕衣笥圖書而已在金陵無
案牘勞得肆力古聖賢典籍故於學庸論孟禮記諸書晝諷
夜思深有味乎其旨且悔學之晚也遇大祀必齋沐出宿官
衙衛官以是日閒暇設宴召公公不御酒肉其酬衛官菜菓

茶餅外無它焉己未秩滿贈父如公官母路配劉俱孺人越
明年庚申致仕渡江謬劫於盜發篋衍無所有驚曰繫清官
也鞠韃而去歸田十餘年讀書談道怡然自適足未嘗履城
市邑大夫屢請賓鄉飲辭謝之曰此朝廷鉅典鳳何人而敢
與乎居常每晨謁先祠婚喪悉如禮制訓子姓以道化及族
里靡弗質朴雅飭初公養母時嘗親耕稼孺人亦躬爲饁有
龐鹿門風公治田精常多獲弟欲以田易公田公欣從焉後
治易田復精復多獲弟又欲易孺人有難色公思有以誨之
值燕會佯令孺人往孺人曰聞有丈夫燕婦人可與乎曰婦
人主家非丈夫耶孺人悟卒從其易聞者嘆服宛陵周公怡

涇陽李公世達皆馳書候訊而盱江朱公大器督學中州特檄表其閭中丞孟津李公稔識公曰方山今之古人也嘗爲二贊寄之其辭曰今也清官昔也清吏秉一寸心對越天地昔也清吏今也清官元風雅度媿我儒酸是時中丞官徐方而公在獻邑後二十餘年尤先生讀而跋云方山翁知道者也廉特翁衆美之一節耳邑中無貴賤長少咸知尊仰於卒也莫不悲傷尤先生聞而哭深以城西約不能踐爲恨嗟乎公胡令人景慕若此哉公孝友貞介樂道安貧人但見爲清吏爲清官謂公廉士至事事以古人自期待中心融融若有真樂外物毫莫能誘則未之深知也吾河南自程邵諸賢後

公庶幾踵其芳躅已公生宏治六年三月朔壽七十有九孺
人壯齡先逝公鰥居歷三十二年綽有子與王駿之操子男
二長岳邑庠生先卒娶劉氏次陵娶李氏繼賈氏女三長適
儒官張先生科次適李登劉道孫男三泮娶喬氏浩娶李氏
岳出淳娶馬氏陵出泮淳俱邑庠生女十一適人者六餘在
室曾孫男一女二泮等卜以十二月八日葬公方山祖兆請
銘於允先生先生以命化鯉化鯉敢以不文辭銘曰

嗟嗟印公秉心真淳生今之世實古之人幼居深山竭力鋤
鋤長遊臬司託身刀筆雖則刀筆乃肇聖功踐履篤實蔚爲
時宗爲吏爲官清風兩袖乞歸渡江拜於舟寇旣返於家蕭

蕭傲廬左圖右史澹泊自如一行一言爲鄉人式秉義揭仁
邦之司直聞者興起立懦廉頑無論長少僉曰方山念念好
學老而不厭今也云亡伊誰型範於乎公之德玉粹金精公
之志孔思周情公之操皜然不緇公之面溫然可噓公之力

中流砥柱巍巍乎師表百世

孟雲
浦集

王烈婦郭氏墓誌銘

孟化鯉

烈婦者新安庠生郭時安之孟女也其生而貞靜端莊嫁而
勤朴孝謹余不暇詳獨誓死殉夫爲烈婦之大者余聞之獻
歎泣然不能止蓋痛節義之不易云烈婦年十七歸王萃秀
僅年半而萃秀病傷寒累數日不汗烈婦晝夜侍萃秀食乃

食萃秀不食亦不食萃秀病革連三日不食烈婦亦三日不食亡何萃秀死烈婦籲天而哭誓以死殉聲出而氣絕仆地少頃乃甦甦而又哭氣又絕又甦如是者再四舅姑知其志請諸姑姊妯娌共勸之多方慰諭志不少回不食者七日姻黨劉某謂烈婦曰若哭爾夫乎然胡自苦如此肯自寬解安知再適不更愈萃秀乎烈婦不應且視且哭又郭某者烈婦叔父也亦謂之曰汝哭誓死爲萃秀也萃秀死抑爲誰乎汝胡自苦如此且汝祖汝父兄妹俱在汝安忍舍之烈婦亦不應且視且哭舅姑知其志請諸姑姊妯娌勸之食且晝夜防守惟謹得不死迨萃秀葬前二日烈婦有喜色奉姑飲食亦

自飲食復謂姑姊妯娌曰未亡人必不欲生第此時未肯死
俟葬我良人歸寧我祖我父既當求一死矣姑及家人信以
爲然又見烈婦飲食也是晚防守少疎烈婦遂走後園樹引
繩就斃姑及家人忽尋烈婦不見卽皇皇視其寢室亦不見
及至園樹抱號解下烈婦已氣絕不可甦蓋萬歷五年四月
二十六日也年僅得十九嗚呼傷哉方萃秀之死也情激心
裂慷慨一死猶或易也至于遲之數日父母戚屬之繾綣姑
姊妯娌之慰諭曾不能一移其初心從容就死如此雖古哲
人達生委命何加焉烈婦蓋非獨能死也訃聞之朝人人痛
愕邑侯沔陽張公擊節嘆賞卽日躬臨其喪且題之曰妙年

貞烈而邑人士方具呈申請乞奏旌表雖于烈婦無所加亦
可以見人心同然而脂韋之士懷二心之臣聞烈婦風當愧
死萬萬矣詎直爲女流輩龜鑑哉烈婦母董氏生烈婦于嘉
靖三十八年五月十六日卜是年五月四日同萃秀合葬邑
城東文峯陰銘曰

於赫烈婦知有夫不有躬烈烈轟轟青年殉夫不愛生獨愛
節轟轟烈烈人曰生爲愈不應人曰死無益不應汝嘿嘿籲
天竟引繩而得正始也誓死飲食不御人皆謂烈婦當必死
旣也色喜飲食忽御人皆謂烈婦當不死吁嗟家人勸諭殷
殷孰知烈婦之爲心繫芳名之赫赫震宇宙而光日月彼二

心者道烈婦之墓傍宜茹烈婦之風霜

同上

任向雲墓誌銘

明 呂維祺

吾友洛陽孝廉任公聞祖氏卒蓋崇正五年壬申十有二月
二十有三日也越二年甲戌其子文學琨將於十有二月某
日葬以其狀來求麗牲之石永諸窀穸呂子曰世之日下也
不得申行而與之卽狂狷亦幾幾乎難之有如聞祖之篤孝
好學而不得行其志復奪其年識者悲之矣按狀公諱紹曾
字聞祖號向雲取狄公望雲之義九世祖諱二老者洪武間
自晉陽徙洛家焉二老生斌斌生智智生儒爲文學文學生
民號近田以明經授隆平學博士隆平士紳嚴事之謂渾夷

剛正有二程先生遺風生子二長諱啟東者卽公王父也次
啟元領萬歷癸酉解額啟東生忠爲邑庠生能孝友早卒今
表貞節李氏其元配云忠生公公母初娠時夢一老頭陀持
一小比丘送之曰此非凡兒也公童時王父呼公至膝下而
命之名曰願汝言動不苟率乃祖攸行公髮方燥卽取曾大
父誌狀日讀之期母負王父教旣授孝經論語詩書晨昏捧
誦曉暢大義鄉先生如王啟環秦一諸公皆咄咄稱竒雲間
陳瀝海督學中州首拔公入膠序公從王心銘學所交多四
方知名士壬子中副榜賈敬仲批有樹幟中原將老其才之
語莆田陳聖苞曹州何大灋爾學使者俱首錄公卷食廩餼

諸直指觀風皆首拔公或時以音書存問蓋重公之端方恬
約不獨區區括帖語也時余方里居入深入密四方學者日
麇至相與講業于芝泉書院以訂伊洛之學介乾明何孝廉
延公爲塾師執牛耳公每出語多中理解每與公言終日不
倦或與家弟吉孺氏及茹爾翁氏聯榻讐較凡四載丁卯公
再抵函谷益加攻苦爲破釜沉舟計三閱月得文百餘首余
曰凡時義十得五者即可售公十得七八知必售矣旣以易
經中二十名蓋本房亞卷也於榜前公有荅友人詩桂杪一
枝須好護今朝到手露華新之句歸而拜母母喜動顏色公
慰爲萊衣戲娛其母且曰吾母茹苦三十年今稍露頭角矣

從此庶可祈報萬一復訓其子琨曰吾家自癸酉發解今始再顯其志如此戊辰辛未兩上春官皆不第猶下帷李氏山莊時或讀書彈琴陶然寄傲最恥干謁每日當使王公大人訝其不來勿使厭其不去其介守又如此先爲証媒社後復爲牴餌社其志守之遠而堅又如此亡何公病齒血又再病痢日坐蕭寺延方士學清淨延年法不效而脾虛氣弱遂不能支尚賦詩云遙知親慮切難稽愛緣奢傷哉公何嘗頃刻不念庭幃耶會孤妹痘瘍疾增劇遂不起彌留之際拳拳念白髮慈幃至云長號子柩造化不仁令人聞之亦哽咽酸鼻

天性之孝屬續愈真且遺命妻若子代以承歡亦庶幾無憾

哉蓋公天性篤孝牛是年甫弱冠而孤父見背時王母尚在堂父執公手訣曰白髮黃口家徒四壁如吾墓中愁何公拜父牀下痛幾絕徐曰有兒在是以菽水晨昏竭力至孝王母張性卞急備極色養稱貸不厭王母患痰嘗藥浣禴歲週無違迨病革襄事情文兼備母李氏苦節以栢舟三十年篝燈紡緝晝荻課讀公事之盡志盡力猶以不得表揚爲恨諸生上其事於督學陳公直指具疏以聞表其閭不求而獲亦異數也里之人皆曰李母有子孝以彰節如此公叔祖母許公姑母皆守節並請于當事旌表之且于其妹及妹夫王君在中及姑之子孫皆周之里中姻黨待舉火者待婚嫁者待償

公家倉糧者公但殫力圖之德表叔張君曾捐高家崖地二百畝以酬有莊民郭大成負利一二百斛竟不責償老僕老姬有無子者馭之甚厚嘗曰喫盡人虧真好漢還清書債是男兒其大者潔烝嘗悲風木遇忌奠祭泪滂滂下永日也事親以色養每見含飴弄孫輒與閨婦私相慰藉其遠就館舍多方備膳饈以免內顧君子曰此篤孝好學士也蓋狂狷之流中之次也所著有四書講意易旨牒餌社草等集皆藏諸巾箱公生於萬歷十四年丙戌三月初七日距卒之日得年四十有七配呂氏內行雝肅生男一卽琨郡庠生娶寧氏庠生寧大武女孫男一名此趾琨出孫女一訃後生也

于祖塋之兆是宜銘銘曰

敲金覆玉公文章桂苑騰驥負笈擔簦公門墻桃李芬芳年
華未登于耄耄姓字不列乎巖廓然而衍正學于一方亦伊
洛之光也生稟乃祖之命歸依乃祖之堂樂哉斯邱千秋萬

禩永斯藏

明德先生文集

兵部尚書贈太傅忠節呂公墓誌銘

國王朝王 鐸

公諱維祺字介孺號豫石河南新安人孟淑人夢月墮懷生
公少卽特立不怙稍長就傅談忠義事動以君子自許十六
爲諸生二十餼庠惇孝悌以世道綱常爲任丙午副榜壬子
年二十六鄉薦癸丑成進士釋褐爲兗州推官陞吏部文選

司歷尚寶太常二卿南京戶部侍郎陞兵部尚書爲李官以德教化民有兄弟爭訟公語以孝弟皆感悟黃河巨盜三十餘公悉剪之繕草室以棲餓者暇則延諸生講經義其爲銓部也清選簿弊無由生謝餽送絕請託房師某求選其弟公持不可答曰詎不知師之介弟歟朝廷之制不敢私而一時貧老待銓者皆得不壅矣光廟徂落人心洶洶百官欲見新天子內侍梗不許入公與耿員外白政府外議靡定豈可阻諸臣欲見意乎遂請見慈慶宮方退熹宗未登大寶諸閹導之幸小南城公急約省臺抗疏謂調護聖躬近御不得干豫政事防微杜漸不可一步輕動魏璫諸侍人已心怵公矣天

啟元年省親歸海內靡然試正學毀書院公建芝泉書院與
諸門人講誦不輟河南會城建瑞祠公以書誦諸紳諸紳隨
無捐貲者瑞益核之甲子季冬推公考功郎中瑞矯旨別推
今上御極起公太常疏陳堯舜之道在聖德治時艱者先挈
大綱任一賢領千人提一事括萬事又疏保泰防微八事留
中改票慎刑黜陪免進講措言官寡欲恢遊上皆嘉納在南
戶部時漕糧額欠數十萬公疏曰財也生有源耗有孔銖兩
剝民恐斷用日賤徒削元氣耳遂晝夜覈之北戶部借南糧
未還者疏爭還之浙杭嘉蘇倭南部抵漕折銀劾布政抵之
搜各省未納銀借藩工銀又隱匿布絹紗銀劾布政抵之清

完屯糧及戶部每年額支銀缺額銀又缺軍糧銀各數十萬計以足欠額而庚昔若掃今遂衍溢修三十六倉五場釐蚤半者及瓜可以足數年之需其禪心實用皆類是矣率南都人士講學會上遣內臣監視戶工九邊錢糧諸騎騷擾州郡公疏請罷上亦悟乃罷遣考績贈三代嚙一子陞尙書草將官苞苴勤操練裁村軍八千餘名肅清黃寇東窺公斬寇謀者十餘人寇遂西公鯁亮不滑凡大事抗義不回而妬亦隨之以積以大計鍛公羽翼可外難服閔居雒與諸弟子講誦自如先是同封公先後捐穀三千八百石銀四千兩修新安磚城犒城兵粥活萬餘人凡桑梓利害調畫當事如驛累

議救荒議折漕議鹽車議書札盈牘皆不避嫌恕百姓陰受其福進孝經註疏表章八要上嘉納尋復職流寇破宜陽永寧窺維公遣家丁殺寇十餘人總兵王紹禹庸怯當事者令紹禹守城聞鼓擊心目駭公守北城方食其子璜琳侍曰王紹禹兵城上與寇隱語寇勢彌張攻不遺餘力此方用肘足時也大人急自愛公曰小子何疑畏維大矣賴皇上之靈豈卽破萬一破我與城同存亡可也今日有進死無退生督城士弩礮雷發多所傷少傾紹禹城內百騎長矛鞞鞞闌路馳殺人城上繩汲寇寇入衆潰走或曰更服逃公曰否否仰天大哭寇至枝戟在面扯公去公收哭無愁色至城西闈周公

廟見大寇營中坐雕几不跪怒曰呂尙書汝何請兵勦我公
厲聲曰我爲兵部尙書恨無兵馬殺汝狗彘今日惟有一死
時福藩與雒人士先縛於前公顧之曰綱常爲重萬萬不可
跪賊皆泣下寇令之降公陽笑曰世寧有屈降呂尙書哉我
當國家事死不顧今之死不辱聖賢不羞覩於天地生正人
死必爲聰正神或欲生之公更媢罵曰生尙書不值一錢北
向拜皇帝曰聖恩未報臣心已竭西向拜父母伸頸就刃遂
死嗚呼痛哉人疇無死公之死得死所哉事聞皇上哀之贈太
傅賜祭塋廕子入監建祠勅歲祀諡忠節士君子談節義易
易耳一日斧鑿當前不免變爲繞指公堅定不屈從容就義

公何如人哉各郡無兵李中丞坐而觀望庸弁不能死戰而
且內鬻縉紳大夫無象庫守土之權又無重兵往往殉節以
死豈不悲乎然公之道已盡公於學已無媿矣千秋萬世忠
節燧燧天壤又何憾耶公生萬歷十五年丁亥七月二十日
終崇正十四年辛巳正月二十一日年五十有五葬於城東
新阡淑人郭氏子長兆璜拔貢任化州知州次兆琳已亥進
士任福建道監察御史銘曰

公之神靈無不燭乎用人拯痛惟於平日焉是圖老之於林
壑之間而遇兵蠱逢其枯何如蚤置之左右以大昌其謨熙
載化瑟調可以消鯨以弭天吳今第區區死節佞醜不敢與

爲徒史雖書於玉匱行人弔於墓衢但曰郊郛之鄉先生死
難之賢大夫嗚呼

新安志

都察院左副都御史董公墓誌銘

國朝呂兆琳

都御史董公之歿已閱歲矣嗣君嘉孚予之壻也請銘其壙
予太息者久之曰士君子際喜起之運陟要津沉毅有大畧
其於天下治忽之故政事得失之關往往前籌不爽非古今
所稱名臣者耶乃甘賦歸來蕭然賁志以逝此其裊躬過峻
風勵惟嚴迄營魄地下猶凜凜若冰霜焉竊於董公見之矣
公諱篤行天因其字順治乙酉舉人丙戌進士歷官都察院
左副都御史加一級以原品歸里余忝姻婭其生平大槩得

之燕閒晤語間者甚悉以故知公者莫余若也公洛中世家
祚遠不可復考今之瓜瓞絲絲則自公之高祖諱和者始和
字時春正德丁卯經魁贈文林郎配張氏生子二汝謙汝豫
謙字大益娶高氏生用威嘉靖丁卯舉人辛未進士官鳳陽
知府豫字思順號四溪嘉靖戊子舉人陝西膚施令調神木
封文林郎祀鄉賢名宦配朱氏繼司氏生四子曰櫝曰挺曰
朮曰來朮乃公之大父字竹亭邑庠生贈通奉大夫配孟氏
繼熊氏俱贈夫人子四維貞維新維翰應祥翰卽公父號鳴
喬萬歷戊午鄉魁贈通奉大夫元配王氏生公與公之弟景
行累贈夫人繼葉氏亦贈夫人誓死殉夫以節烈奉旌方公

母王氏棄柩椁時公甫弱冠弟景行髮尚未燥太夫人病劇公侍湯藥目不交睫衣不解帶願以身代卒不起哀毀骨立三年如一日鳴喬公捐館舍侍疾持喪如太夫人時其事葉夫人無異毛裏葉夫人以節顯公以孝聞兩兼有焉嗣是天降喪亂洛城灰燼公携家避難河朔集昆友輩仍孜孜講誦不輟值

皇朝鼎運開科公感會風雲遂聯兩榜釋褐後陟鼇坡游鶴禁擢居大諫首陳黜陟大典謂庸劣則蠹民闕冗則誤國何可使一日居民上旣而與定規制使天下田賦有則無苦樂不均之嘆其關於民瘼匪淺也諸如清官方釐鹺政蒿目時

獎者多與宣公奏議相頡頏。每日間補禮垣而先試其能於
貢舉之役。江左戊子一榜稱爲得人。由是入對從容屢參機
務。爰從銀臺。晉問卿協理兵部。督捕堂事。明允持平。所全活
者數千家。蒞政多年。榮冠京尹。鴻猷日麗。太常擅禮樂之宗。
瓊闥高登。通政司駁封之柄。公履盈思挹。將拜表以乞聞而
獎眷彌殷。晉職都憲。雖公未以節鉞出鎮。固諸司百度之所
總也。公則几几溫溫。不自用而用人。虛懷其若谷焉。至申詞
令而飛白簡之霜。挾奸邪而奮破柱之勇。抑又斷斷如也。及
四牡駮駮爲

天子代祭南海。贈爵益級。古所稱同律加地者。非耶。至歸里

後惟日與戚友續耆英香山之社於世俗榮利泊如也而心切時事家不忘國以洛陽地未析畝諄諄告之長吏如河夫一役公所力請蠲免者也公之德惠及人類如此大抵公之生平廉以持己靜以寡慾寬以御衆羣以保世故能順受介祉令終有俶且克昌厥後也公生於萬歷壬子正月十八日卒於康熙丁卯十二月二十三日壽七十有六卜於康熙己巳十一月初三日葬北邙之新阡公初配穆氏累贈夫人繼黃氏封夫人喬氏封恭人梁氏待封男嘉孚恩廕官監候選國子監典簿余季女配焉孫三萬山萬戶萬選萬山聘余姪長葛教諭賁恒女萬戶聘庠生穆公諱瑤女萬選聘壬戌科

進士兵部車駕主事前翰林院庶吉士袁公諱拱女俱余女
出例並書之銘曰

廉貞者其德也休容者其量也效蕃宣享期頤生順而沒寧

體胖而心舒繫惟董公萬年之攸居

洛陽志

僉事郭公墓誌銘

國朝

薛所蘊

余承乏南宮得悉當世賢大夫德業行誼而採風使者有自

武林來輒傳余友裕九治杭巖狀嘖不容口未幾以勞瘁封

疆殉于王事訃聞舉朝駭悼余辱親串輟食內畫今夏冢君

嵐槃橐幣戒使匍匐二千里持所自爲狀請余銘隧中石余

方爲社稷惜人敢以不文辭按狀公諱一鷗字翔南裕九其

號原籍晉之洪洞始祖從道避亂居洛陽平樂村傳九代生公高祖牖牖生子六長可權庠生公會祖祖遵夏庠生封監察御史祖妣喬氏子二長景運選貢封朝議大夫公之父也李氏封恭人公之母也封公有至行篤學不仕封公之弟大叅公景昌前戊辰進士歷山東巡按山西巡撫御史以直諫名公兄弟三人伯一鵬拔貢候選知縣仲一鶚己丑進士選庶吉士歷吏科都諫今擢陽和道季卽公也公幼穎悟嶄嶄頭角異凡兒初就外傳讀經史皆洞豁大意屬文驚座未弱冠補博士弟子員登

皇朝丙戌開科進士授山東萊州府推官萊多疑獄公飲水

卻饋諸所讞鞠焚香誓神虛中慎剖擬辟者務爲曲求生地而巧猾羅織縱恣大府旨決不撓三尺少賈之政暇進諸生課帖括手親品題先後釋褐者咸賴埏埴云是年冬青州寇熾公規條守陴萊境安堵丁亥春攝篆昌樂搜勦蠶孽密擒狡窩子夜統師暗搗賊窟於邑西南之堯溝縛其渠魁自是青壤獲謐甫逾月幾臻銷刀買犢之風昌人饒碑紀功公凡李萊二稔節鉞諸公剡章交騰擢禮部精膳司主事庚寅晉本部員外郎轉祠祭司郎中公司三禮久有美聲每思太夫人年高善病心切歸省會

上設御藥房取參附鹿茸諸熱補物經公驗呈公

疏言五穀養身金石草木未可輕信况老不宜洩少不宜補
伏願節飲食謹嗜慾省遊玩親大臣將見理義悅心精明強
固又何醫藥之足云也

上覽奏不懌而實嘉公忠直內院兩票擬重譴

上皆弗允止鑄一級外調焉公跨驥歸里鍵戶屏遊滌瀆娛
親課子別墅絕情仕進歲之甲午有

詔起用山林豫撫並當軸者數檄徵公公以疾固辭同李邑
長復到門勸駕公不獲已適仲兄給諫公典江右試回公同
滌卮羹拜封公壽畢乙未春鞞鞞北轅司衡欲據改降量移
朝臣聚言公骨鯁貞讜方當大擢審若茲公論云何司衡無

以奪擢銓浙江杭嚴兵備道先是舟山爲勅寇盤據全浙騷
動公受事三日值重兵入勦壘夾草橋門貿易鱗集舊爲牧
馬地大耗生業瘴苦莫支公力請開府秦公躬出江上量度
廣隘同八旗兵各畫疆界俾河以北假兵河以南還民有旗
官僦民舍二間公申飭軍律不爲狗阿數十萬貔貅僉憚其
威卽大將軍幕府精嚴見公亦爲斂容未浹旬署驛傳篆閩
中屆用師公於戰艦渡艫咄嗟而理不損縉羨鵬弁定海上
攻戰之需如銅礮火藥鉛子架梯悉公造局督辦晷刻無遑
息新開府陳公燾臨公迎晤舟次覲公形悴貌瘠深嘆清苦
嗣遇疑難率藩臬僚佐會決臧否公舒徐贊襄切中要領陳

公每爲擊節故闖政洪纖必諮公後舉相倚如左右手浙風
藪盜草竊時發自春歷秋日鞠數大獄矚罪苦絕株連立爲
正法屬吏無緣鍛鍊公吐音鏗鐘而體素清癯兼劼砮

簡書篋饒類廢積瘵遘疴於七月二十二日告沐適寧波大
將軍進兵舟山調杭郡黃頭三百兵各防汛忽二十六日晝
晦風雨黑濛公少痊謁撫軍謀抽師出胃風寒病益劇公自
審不諱神宇炯朗惓惓君親無一兒女酸態正衣冠令人掖
至公堂目始瞑歿之日篋中不盈二十金僚屬會哭各捐資
賻助乃得輦櫬江臯攀紼號泣者不下數萬人櫬發數日大
將軍蕩平舟山露布馳捷嗚呼公可謂廉敏忠勤不負所志

而杭浙喪公猶喪慈媪何以寬東南憂哉公生平性純孝侍
兩兄篤友于盡瘁酬國以膽識勝簡易謙和與人交久而彌
篤厭惡奢華宦十年廳事不容旋馬田不及百畝僅割餘俸
購書數百卷藏於家公生于萬曆己未十二月六日卒於順
治丙申八月九日年三十八配李氏贈恭人推官諱樹葵女
先公卒繼喬氏封恭人子一恒鎮庠生廕貢丁酉十一月日
合葬洛陽卽山祖塋斧坊之次銘曰

帝降天策王幹挺蠱胡厚公材尊公之速孔愛嬰啼棠華或
或蚤奮丹衢鸞鵠相逐萊空肺石儀曹含馥抗疏嘗鬱攫鱗
歸沐朝論待公往殿淞服嘔血疆圉龍戶免疾魚麗鶴列湖

光靜穆水蘄桐江箕尾乍翻干城雖摧鯨鱷亦戮將士樓船
枕甲宵哭公眷西吳黎民食福齒齋於德位未竟蓄曠航灝
氣千古英肅妖鳴九頭樹介述谷果踐大寢坤輿顛屋哲嗣
續承神啟其續繩繩受祉萬禳貽穀

舊志

右江道袁公墓誌銘

國朝 冉覲祖

紫臣袁公以壬戌與館選讀中秘書及辛未予乃繼公後塵
勸導公前輩公謙不自居交情甚洽蓋所尚質樸予兩人有
針芥之合也後予有嵩陽之行過密值公密令署中握手話
舊留連竟夕知公宦興已闌悠然有陶公松菊矣丙申冬公
冢嗣昌齡造予廬匍匐出狀以誌銘見委予念生平知交不

能自緘言之不文不遑避也按狀公諱拱字紫臣棗園其號
系出汝南明初由洪洞遷洛六傳而大斐生孟族孟族生加
賜加賜生存煥存煥生文增字奎明公父也配段氏後公貴
父母皆以例得封公生而穎悟年十二行文浩落不羣爲宿
儒哲匠所驚服試輒冠其軍貢上國登鄉薦壬戌成進士選
入庶常甲子冬散館廷推公有幹濟才試以部職丁卯春補
兵部車駕司主事是冬有監督海運差人或爲公難之公履
如坦途釐弊剔蠹咄嗟而辦丁外艱歸起補本部督捕司主
事陞職方司員外郎甲戌陞戶部浙江司郎中例外轉丙子
除粵西分巡右江道粵俗獷悍公體察民隱因勢利導農安

其業士興於學不數月而風化大行城中兵民雜處公申明
約束卒伍帖然民有徐乾者約歐氏女爲婚後歐富不以女
歸徐屢訟歐皆以賄免公至徐復訟歐以百金請庇公佯受
之及廷訊出金折之歐乃服罪因諭曰汝賴婚以壻貧也將
此金付壻作粧資則不貧矣卽日命鼓吹送女至徐完婚一
時觀者如堵頌聲徹衢巷卽此一事粵西之治大端可睹矣
主車駕司政時分校北闈爲郎戶部充武闈試官皆公慎自
矢稱得士以公之宏才偉畧而服一官卽盡一職任一事卽
見一長可謂受祿不誣矣夫何一丁內艱絕意仕進嗚呼人
生仕宦而後日相角於榮辱得喪情僞攻取之場或至濡足

滅頂老死而不知止如公之難進易退年逾強仕納履而去其爲人賢不肖何如也公孝行醇備生事盡祭無不如禮昧於宗族和於鄉黨賙貧濟荒倒篋無所吝林居十九年足跡不入城市無請謁之私而遇有事關郡邑利害者必深籌而預計之詳爲當事指陳人被其福而不知所自詩文集若干卷藏于家公生於順治六年七月二十日卒於康熙五十三年十月一日年六十六配郭氏贈安人子四昌齡昌瑞良護昌譜越三年合葬祖塋卽山之陽乃爲之銘曰

緬溯前徽汝南巨族屢遷就吉洛汭是卜祥發哲人媿德金玉藻續流輝縹緗挂腹奮迹玉堂雲龍追逐歷職郎署澄懷

無慾鉅細煩簡應如破竹廷推長材遠蒞殊俗仁以施惠智足摘伏隨方設施兵輯民服奔喪歸里永辭寵祿林居廿年怡情松菊內助有德偕老華屋榮瘁有時譬諸草木造物無心返真匪促地以人靈氣因德蓄葦茲泉壤鍾厥後福

永光文集

蘆院裴公墓誌銘

國朝

呂履恒

吾邑自孟雲浦先明德後蓋多君子云其窮而在下者得二人焉曰邱方山裴華池方山以文無害爲掾吏清節聞於後世而華池亦終於文學其爲人多忠孝大節嘗率衆保聚拒賊仁而有勇者也又得哲嗣蘆院先生顯揚其遺緒學者得以稱述之不倦予少時嘗誌華池之墓於今二十有五年而

蘆院卒於里門易簣時謂其子虹曰吾生平學不求名汝曹若不沒吾行事則莫若同邑呂子之知我深也其訃而屬銘焉嗚呼先生往矣其嘉言嫩行蓋不勝書書其大者以嘉惠來學俟諸史氏是後死者之責也敢不承命先生諱袞字九章居蘆院里因以爲號系出唐晉國公度後明初諱成者爲先生始祖自聞喜遷河南之新安世有淳德六傳至高祖洲以德行賜儒官曾祖光前諸生祖椿以孝友稱父翰芳字華池以諸生贈奉直大夫兵部員外郎祀於鄉娶高氏生袞繼黃氏生褒先生自爲兒時動中儀則事父母定省不踰時出入跬步必告侍大母疾無間蚤夜及長與弟褒友愛彌篤先

生旣遊庠序隨父館澠池得悉讀曹月川集乃嘆曰一代真儒也弗是之學亦虛生耳明末避難山中躬汲爨以奉親愉婉承順猶日三復月川諸書心私淑之 國朝丁酉舉於鄉已亥成進士自是學日進然簡穆寡營人或易之初不謂先生能官也初授粵西貴縣知縣時逆藩倡亂道塞或沮其行先生曰甫爲人臣而卽以趨避爲自全計謂所學何卒往抵粵東肇慶從總制議軍儲以圖恢復會粵西盡陷乃之吉安道中數遇賊秘其符以智得脫開府佟公雅重其節概代咨部得改授江南溧陽溧陽稱劇邑難治豪黨繁有徒令至卽陷以利因挾其短長不則市逋逃奸盜以中之鮮有解免者

或爲先生難之先生曰昔人以盤錯別利器事無難顧力行何如耳旣至吏果以千金進先生誓而却之將置諸法吏泥首膽落乃已因摘發邑中豪猾及漕弁之數爲奸利者剪其魁百姓安堵歲旱勸富室出粟或躬詣其家爲陳說利害人無不立應者復泣請於兩臺奏免額稅前後三萬餘金設糜全活者以億計其他善政率類此政成被

召命以丁太宜人艱歸讀禮時益潛心孝經日取先明德所著義疏尋繹之欲集爲成書未就服闋授兵部督捕主事在官逋逃無株連者督儲通州卻餽遺漕運如期庚午貳江南典試得人爲盛晉武選司員外郎尋以足疾假歸在籍十餘

年乃終時康熙四十三年九月十七日也距生年天啟壬戌得壽八十有三配韓宜人邑善人韓惟新女子男四虹岨嶸峻女一娶嫁具詳狀中孫七紹祖縉祖緒祖繹祖繩祖纘祖統祖曾孫七人凡三世彬彬文學稱其家兒也先生之學自慎獨而力行仁孝根心順達而不窮既私淑曹正夫月川等其墜緒復矩步於孟雲浦先明德之芳躅以儉居德以禮善俗喪致哀祭致誠履信撝謙恂恂若不能言然賦性剛介有一介不取之操以故有志必爲爲必成雖位不酬德其設施亦畧見於世矣其在兵曹也有故人以五百金越例求官先生曰予不忍自汙而忍汙故人乎求者慚而退同邑陳心齋

先生以書勸講學先生辭曰某自度生平爲所不爲欲所不欲者多矣復何敢然嗚呼自聖言微而講義繁好名者咸奔走如鶩甚者恃其資力自托於坐忘頓悟騰口說而遠事情宜乎儒效日疎而誦詠者衆也若先生所謂不言而躬行者乎韓孝廉君翼次其年譜謂先生爲真學術信夫予侍教先生久亦竊有志於學矣而志不強立遂瀆落無成先生之屬予銘也繫豈重吾言俾知所謂學者在此不在彼耳卜於明年月日葬先生於方山祖阡而以韓宜人附銘曰

先生之德柔惠且直教起於家政施於國人擷其華我落其實羣飲爾和罔不克溢惟恭則壽乃寧爾室山蘊百靈水鍾

百脈以利其孫子世象厥德後有願學者視此銘石

治古堂集

呂少司農墓誌銘

國朝

田從典

余自粵東歸里居候選間訪梓鄉吏治士民嘖嘖稱寧鄉呂公譽之不容口云康熙四十二年之冬科道員闕

御試部屬及行取縣令以奏疏二篇余忝在試列見有舉止端凝從容於奏對者則公也及退閱其草剴切而爾雅

命下旋拜監察御史自與公同時入臺周旋朝省至於卿貳

相知尤深云公起家知寧鄉縣當荒歉之後署中儲侍悉闕

或謂其不便公曰事事求便於己則不便於民者多矣請於

郡免差提下縣緩徵減耗招徠流亡鬻子女者爲設法捐俸

贖之盡草陋例暇日則與士子講學論文科名以興卒以報
最行取入御史臺巡視中城釐奸剔弊不遺餘力典試雲南
江南及爲留都丞皆掌文柄公素工制科業而矢之至公所
得皆知名士今濟濟詞臣之英指不勝屈也爲僉都御史時
男子宗四因姦殺許氏母子五命賄囑屍親將息訟矣公駁
之曰許氏卽自殺不必殺其子女且右肘已斷右肘斷不能
自殺先自殺誰斷其肘乎卒寘之法總督倉場咨訪利病不
縱不過監督運弁無不感且畏改佐司農與尚書武進趙公
同心協力終始無間言兩任皆錢穀煩劇第以夙夜在公孜
孜無斁出內會計吏不得爲奸公爲人寬厚長者忠朴無他

賜而感慨意氣其於得失毀譽毅然而不顧擴然而不留初
入臺時相國李文貞公巡撫畿輔文貞爲一時欽望

簡任方隆公以秋審事意見未合卽具疏激切入

告厥后文貞當國益重公人兩賢之爲副都御史時侍御徐
君諱樹庸建言曾指及公公不以爲嫌及佐司農乃於廷推
薦之久之侍御內陞允佩服公之德量苟非天資素厚聞道
之君子孰能與此哉此余之於公一見如平生而久之尤爲
心醉也公詩文甚富皆有集行世詩宗盛唐尤稱作者嘗曰
詩闕氣運不可不知夫發而不收雖造化爲易盡極而不返
卽人事爲無功是故由盛唐趨而爲中晚宋元甚易由中晚

宋元復爲盛唐甚難然而難易者其勢而勢無往而不復之
理苟不惟其理惟其勢微特中晚宋元卽盛唐之詩已先不
能復而爲漢魏爲三百篇矣謂刪後無詩可乎吾於中晚宋
元非不賞其竒樂觀其變然由竒以思其未始有竒由變以
思其未始有變則采絢猶白賁也舍盛唐將安歸乎其論詩
如此故自漁洋王大司寇相國陳文貞公皆當代宗工於詩
皆推公焉自公之去感念良友嘗爲長歌寄之不圖歲在龍
蛇大星忽隕寢門之痛其能已已乎令嗣憲曾等以墓門之
言爲請噫舍余誰當銘公者公姓呂氏諱履恒字元素號坦
菴宋宰相文穆公第六子兵部侍郎諱居簡之後明初諱俊

者由山西洪洞遷河南新安俊生獻獻生鑑鑑生思聰思聰
生元元生景陽景陽生鄉贈戶部侍郎鄉生孔學封戶部侍
郎又以賑饑特贈右都御史公之曾祖考也南京兵部尚書
贈太傅諡忠節公諱維祺殉難鄉郡學者稱明德先生公之
祖考也

皇清福建道監察御史贈中憲大夫都察院左僉都御史諱
兆琳公之考也妣王氏封孺人贈恭人孟津王文安公鐸女
公以康熙甲戌科進士初授山西寧鄉縣知縣行取考選廣
西道監察御史內陞歷奉天府府丞通政司右通政都察院
左僉都御史陞宗人府府丞都察院左副都御史總督倉場

戶部侍郎轉戶部右侍郎生於順治七年九月十一日卒于
康熙五十八年五月十九日年七十明年冬葬新安城西北
之原元配王氏山東濟東道無黨女文安孫也贈恭人繼徐
氏王氏並祔墓今夫人王氏封恭人子男三憲曾宣曾並舉
人守曾附學生孫男四人公遷公澤公詒公望公家世經術
科名特盛自忠節以下四世第進士厥弟今編修諱謙恒謙
恒之子今中翰諱耀曾皆科甲宜牽連書之銘曰

有所見於心必矢於口是爲言官之守有所觸於外不繫於
中是爲大臣之公遠繼文穆之德量近繩司馬之朴忠讀書
有得操行克終不朽者三曰德言功峻函之原連華挹高鬱

鬱萬年奠此幽宮

新安志

光祿卿呂公墓誌銘

國朝 方苞

雍正五年冬

詔公卿舉賢才光祿卿呂公具劄不合儀式

天子夙知公謹慎年篤老許以原官歸休余與公子耀曾爲同年友而公於余尤志相得將行朝夕過從要言書問必時通俄而訃至則至家之三日晨興沐浴飯罷而終公年四十有一始舉於鄉又十有七年成進士由翰林改御史轉給事中遷鴻臚大理至光祿寺卿所歷必張其職三主鄉試再充會試同考官士論翕然其爲御史巡城會

南郊奏以雍草徵役胥吏因緣病民又奏夏秋之交洞庭瀧
濤壯猛湖南士赴鄉試苦遭覆溺宜分設棘闈

天子皆爲更舊制公名位非甚盛而以渾厚方直爲衆所推
其沒也凡與交接者皆曰薦紳中典刑又失其一矣自容城
孫徵君講學淇源湯司空耿詹事名節在天壤由是中州士
大夫多好言理學而公兄弟則尚質行以文學知名公兄少
司農坦菴公與吾亡友崑繩治古文而旁及於詩公則以詩
名而兼治古文余嘗以古文義法繩班史柳文尚多瑕疵世
士駭詫雖安溪李文貞不能無疑惟公篤信焉公至性過人
喪父母壹稟禮經自少至老未嘗與司農久離戊戌春司農

罷歸次年五月公忽拊膺而呼曰不得與兄見矣數日訃果
至司農之歸也思公爲樂府一章時命耀會之子肅高相和
而歌歌竟而哭厥後公展視輒掩涕吞聲耀會乃竊而藏之
公貌端嚴生平坐立無偏倚讀書青要山凡數十年所居特
室臨牕設几坐下二足跡深寸許幾穿其磚呂氏系出宋丞
相文穆公第六子居簡其後自洪洞遷新安至明季大司馬
忠節公始光顯自是五世表冠甚盛家法爲士大夫宗耀會
嘗卧病內寢余入視帷帳茵褥爲寒士所不堪肅高捧盤承
飲而進啣之則已舉於鄉矣雖呂氏家法抑亦公之身教也
余許序公青要集久而未就公欲爲古詩數章贈余曰吾歸

以詩來則子之序母更遲之又久矣肅高爲余述公在途諄
諄及此耀曾至自西川來乞銘余於公旣負諾責矣今忍不
銘公諱謙恒字澗樵以雍正六年四月二十一日卒於孝慈
莊年七十有六考諱兆琳福建道監察御史以司農

贈都察院僉都御史妣王氏孟津王文安公女

勅封孺人

誥贈恭人妻王氏太常寺少卿諱無咎女文安公女孫子三
人承曾雍正甲辰舉人揀選知縣光曾康熙戊子舉人陳留
縣儒學教諭耀曾康熙丙戌科進士四川按察使孫五人女
孫九人以某年月日葬於某鄉某原其世系具忠節公傳誌

故不著銘曰

望其貌而心可知敦於行而文副之祖德克儀以爲世裔師

望溪集

安徽布政使李公墓誌銘

國朝
袁枚

乾隆十年十月二十一日安徽布政使李公卒於官江寧令
袁枚入奠畢泣而言曰前年枚知江浦謁公於蘇公召入已
二鼓與語卽視偉枚今年枚知金陵公來作承宣司彼此舍
然喜有無窮言未竟公竟怛化枚無以報今將歸墓願請狀
以爲公銘其幕府蔡西樵曰公年五十有五不自意死呂夫
人第三娶也長子某試禮部未歸其季幼奴多村氓賓客輩

暫從公遊無能知公者公誠懋其行事坦坦而肅章奏文集
成輒削藁諸善狀不能記憶但遠近見者莫不額手曰李公
真君子也請畧舉其槩而紀存之枚曰唯唯謹按公諱學裕
號餘三世居洛陽縣以雍正五年進士入翰林累官御史巡
道按察蘇州遷安徽布政使而卒巡京畿時唐山令某奪僧
舍爲民房

世宗怒幾不測公奏書生毀佛愚無大罪令竟免故事巡城
者遇事動咨刑部延累至歲餘公停車決遣獄無滯留捕博
具數十籠曰貪紀錄而置民于軍吾不忍也杖犯者使去碎
其具於庭石爲之凹後過者猶指笑曰此李公槌博具處也

出使安南披一品服登王正殿宣聖諭畢乃坐述 朝廷柔
遠之意公儀觀既偉音節鏗然其王嗣黎維祐俯伏受命夷
言嘆好使臣者數萬人蜀土司大小金川聞公爲建昌道輕
車往撫入密箐中天日隱黑猺獯梟目鳥語挾雪刃喉向公
公短後衣坐地召其渠帥賜酒食命譯者曉以大義羣獯翁
然喜折樹枝爲公策馬歸城乾隆七年淮徐災募糧者累有
司以盜聞公曰此饑民非盜也獄具所活數百十八夜閱秋
審冊專意平反燭燼數升僮卧躄躄甚酣而公竟申旦卒以
此致病理安徽災賑尤勞遂不起嗚呼公急于活人而忘所
以曰活使公稍自愛官必不如是止所活人亦必不如是止

原书缺页

原书缺页

祭文

弔夷齊文

魏王粲

歲昊秋之仲月從王師以南征濟河津而長驅踰邠阜之崢嶸覽首陽於東隅見孤竹之遺靈心於邑而感懷意惆悵而不平望壇宇而遙弔抑悲古之幽情知養老之可歸忘除暴之爲仁潔已躬以騁志愆聖哲之大倫忘舊惡而希古退採薇以窮居守聖人之清概要旣死而不渝厲清風於貪士立果志於懦夫到於今而見稱爲作者之表符雖不同於大道合尼父之所譽

王仲宣集

登箕山祭巢許文

唐王勣

懷二子之高烈背嵩嶽而來遊挹千載之遐軌登箕峰而少
留昔時慷慨神輕九州今來寂寞魂辭一邱英蹤落而猶在
精誠真而遂幽山荒廟僻地古松楸吾鄙懷之有素仰前哲
之清猷同聲必感異代相求如至誠之見接庶蘋蘩之可羞

祭處士仲長子光文

唐王勣

歲月日隣人王勣謹以魚醴之奠敬祭仲長先生之靈曰明
道若昧進道若退鳥飛知還龍亢必悔嗟嗟夫子理融其內
不忮不求無憎無愛古人有言微妙元通藏用以審養正以
蒙嗟嗟夫子允執其中不見其始孰知其終蕩蕩心跡悠悠
然語周覽人事退居河渚何去何從誰求誰與聊同聚散亦

均寒暑大矣夫子其生若浮至矣夫子其死若休鄉黨不懼
朋友不憂素琴猶在黃經尙留老萊難婚梁鴻難偶筵無饋
奠室無箕箒嗟嗟夫子豈圖其後金玉滿堂莫爲之守凡我
故人素服臨旛葛巾從窆桐棺以遷墳不易壠坎不及泉苟
無怛化於何問天道性旣喪仁義鋒起祭非古也禮之爲始
吾從其俗敢告夫子清樽薄奠神其歆止

王無功集

祭遠祖當陽君文

唐 杜甫

維開元二十九年歲次辛巳月日十三葉孫甫謹以寒食之
奠敢昭告於先祖晉駙馬都尉鎮南大將軍當陽成侯之靈
初陶唐氏出自伊祁聖人之後世食舊德降及武庫應乎虬

精恭聞淵深罕得窺測勇功是立智名克彰繕甲江陵稜清
東吳邦於南土建侯於荆河水活活造舟爲梁洪濤奔汜未
始騰毒春秋主解橐隸躬親嗚呼筆跡流宕何人蒼蒼孤墳
獨出高頂靜思骨肉悲墳心胸峻極於天神有所降不毛之
地儉乃孔昭取象邢山全模祭仲多藏之戒焯序請文小子
築室首陽之下不敢忘本不敢違仁庶刻豐石樹此大道論
次昭穆載揚顯號予以采繫于彼中園誰其尸之有齊列孫
嗚呼敢告茲辰以永薄祭尚饗

工部
文集

祭故相國清河房公文

唐杜甫

維唐廣德元年歲次癸卯九月辛丑朔二十二日壬戌京兆

杜甫謹以醴酒茶藕蓴鱖之奠奉祭故相國清河房公之靈
曰嗚呼純朴旣散聖人又歿苟非大賢孰奉天秩唐始受命
郡公間出君臣和同德教充溢魏杜行之夫何畫一婁宋繼
之不墜故實百餘年間見有輔弼及公入相紀綱已失將帥
干紀烟塵犯闕王風寢頓神器圯裂關輔蕭條乘輿播越太
子卽位揖讓倉卒小臣用權尊貴倏忽公實匡救忘餐奮發
累抗直詞空聞泣血時遭祲沴國有征伐車駕還京朝廷就
列盜本乘弊誅終不滅高義沉埋赤心蕩折貶官厭路讒口
到骨致君之誠在困彌切天道濶遠元精茫昧偶生賢達不
必際會明明我公可去時代賈誼慟哭雖多顛沛仲尼旅人

自有遺愛二聖崩日長號荒外後事所委不在臥內因循寢
疾顛顛無悔矢死泉途激揚風槩天程旣折安仰翊戴地維
則絕安放挾載豈無群念我心怵怵不見君子逝水滔滔泄
涕寒谷吞聲賊壕有車爰送有紼爰操撫墳日落掛劍秋高
我公誠子無作爾勞殮以素帛付諸蓬蒿身沒萬里家無一
毫數子哀過他人鬱陶水漿不入日月其滔州府救喪一二
而已自古所歎罕聞知己曩者書札望公再起今來禮數爲
態至此先帝松栢故鄉粉粹靈之忠孝氣則依倚拾遺補闕
視君所履公之罷印人實切齒甫也備位此官蓋薄劣耳見
時危急敢變生死君何不聞刑欲加矣伏奏無成終身愧耻

乾坤慘慘豺虎紛紛蒼生破碎諸將功勲城邑自守鞶鼓相
聞山東雖定灞上多軍憂恨展轉痛傷氛氲元豈正色白亦
不分培塿滿地崑崙無群致祭者酒陳情者文何當旅櫬得
出江雲嗚呼哀哉尙饗同上

祭田橫墓文

唐韓愈

貞元十一年九月愈如東京道出田橫墓下感橫義高能得
士因取酒以祭爲文而弔之其辭曰事有曠百世而相感者
余不自知其何心非今世之所稀孰爲使余歔歔而不可禁
余旣博觀乎天下曷有庶幾乎夫子之所爲死者不復生嗟
余去此其從誰當秦氏之敗亂得一士而可王何五百人之

擾擾而不能脫夫子於劍鏃抑所寶之非賢亦天命之有常
昔闕里之多士孔聖亦云其遑遑苟余行之不迷雖顛沛其
何傷自古死者非一夫子至今有耿光踧陳辭而薦酒魂髣
髴兮來享

昌黎文集

祭竇司業文

唐韓愈

維年月日兵部侍郎韓愈謹以清酌庶羞之奠祭于故國子
司業竇君二兄之靈惟君文行夙成有聲江東魁然厚重長
者之風一舉於鄉遂收厥功屢佐大侯以調兵戎詔曰予虞
汝爲郎中乃令洛陽歲且四終惟刑之慎掌正隸僮命守高
平命副儒宮朱衣銀魚象服以崇錫榮考妣孝道上窮官不

滿能亦云達通踰七望八年孰非翁在君無憾我意不充君
子昆弟三以辭雄刺史郎中四繼三同於士大夫可謂顯融
我之獲見實自童蒙既愛既勸在麻之蓬自視雛鷺望君飛
鴻四十年餘事如夢中分宰河洛媿立竝躬俱官於學以織
臨洪惠許不酬報德以空死生莫接孰明我衷於祭告情文
以自攻嗚呼哀哉尙饗

同上

弔萇宏文

唐
柳宗元

有周之羸兮邦國異圖臣乘君則兮王易爲侯威強逆制兮
鬱命轉幽疹蠱膠密兮肝膽爲仇奸權蒙貨兮忠勇以劉伊
時云幸兮大夫之羞嗚呼危哉河渭潰溢兮橫驅以抑嵩高

圻陔兮舉首排直壓溺之不慮兮堅剛以爲式知死不可撓
兮明彰人極夫何大夫之炳烈兮王不悟夫讒賊卒施快於
剽狡兮但就制乎強國松柏之斬刈兮蕪茸欣植騏驪折足
兮罷驚抗臆鷺鳥之高翔兮孽狐惴而不食竊畏忌以羣朋
兮孰病百而伸一挺寡以校衆兮古聖人之所難矧援羸以
威傲兮茲固蹈危而違安殺身之匪子戚兮閔宗周之不完
豈成城以夸功兮哀清廟之將殘嫉彪子之肆誕兮彌皇覽
以爲謾姑舍道以從世兮焉用夫考古而登賢指白日以致
憤兮卒頽幽而不列扳上帝以飛精兮黜廖廓而殄絕竭馮
雲以狷愬兮終冥冥以鬱結欲登山以號辭兮愬洋洋以超

忽心沍涸其不化兮形凝冰而自慄圖始而慮末兮非大夫
之操陷瑕委厄兮固衰世之道知不可而愈進兮誓不偷以
自好陳誠以定命兮侔貞臣以與爲友比干之仁義類兮緬
遼絕以不羣伯夷狗潔以莫怨兮孰克軌其遺塵苟端誠之
內虧兮雖耆老其誰珍古固有一死兮賢者樂得其所大夫
死忠兮君子所與嗚呼哀哉敬弔忠甫

柳州文集

弔夷齊文

唐柳 識

洪河之東兮首陽等崇側聞孤竹二子昔也餒在其中
胡爲得仁而死青苔古木蒼雲秋水魂兮來何依兮去何止
掇澗谿之毛薦精誠而已初先生鴻逸中州鸞伏西山顧薇

蕨之離離歌唐虞之不還謂易暴兮文武謂墨綬兮胡顏時
一叱兮忘饑若有誚兮千巖之間豈不以冠敝在於上履新
居於下且曰一人之正位孰知三聖之純嘏讓周之意不其
然乎是以知先生之所恤者偏矣夫當昔夷羊在牧商綱解
結乾道息坤維絕鯨吞噬兮鬼妖孽王奮厥武天意若曰覆
昏暴資濬哲於是三老歸而八百會一戎衣而九有截况乎
旗錫黃鳥珪命赤鳥俾荷巨橋之施俾伸羨里之辜故能山
立雨集電掃風驅及下車也五刃不礪於武庫九駿伏轅於
文途雖二士不食而兆人其蘇旣而溥天率土咸爲周人于
嗟先生逃將何臻萬姓歸飾兮獨鬱乎方寸六合莽蕩兮終

跼於一身雖忤時而過周終臣心而慟殷所以不食其食求
仁得仁然非一端事各其志若旁通以阜厥躬應物以濟其
利則焉有貞節之規各親之事靈乎靈乎雖非與道而保生
乃勗爲臣之不二

文苑
英華

祭元相公文

唐白居易

維太和五年歲次辛亥十月乙丑朔十七日辛巳中大夫守

河南尹上柱國晉陵縣開國男食邑三百戶賜紫金魚袋白

居易謹以清酌庶羞之奠敬祭於故相國鄂岳節度使贈尚

書右僕射元公微之之靈惟公家積善慶天鍾粹和生爲國

楨出爲人瑞行業志畧政術文華四科全才一時獨步雖歷

將相未盡謨猷故風聲但樹於藩方功利不周于夷夏噫此
蒼生之不遇也在公豈有所不足耶詩云淑人君子胡不萬
年又云如可贖兮人百其身此古人愛惜賢良之懇辭也若
情理憤痛過於斯者則號叫噎噀之不暇又安可勝言哉嗚
呼微之貞元季年始定交分行止通塞靡所不同金石膠漆
未足爲喻死生契濶者近三十載歌詩唱和者九百餘章播
於人聽今不復叙至於爵祿患難之際寤寐憂思之間誓心
同歸交感非一布在文翰今不重云惟近者公拜左丞自越
過洛醉別悲咤投我二詩云君應怪我留連久我亦與君離
別難白頭徒侶漸稀少明日恐君無此歡又云自識君來三

度別遮迴白盡老髭鬚戀君不去君須會知得後回相見無
吟罷涕零執手而去私怪其故中心惕然及公捐館於鄂悲
訊忽至一慟之後萬恨交懷覆視前篇詞意若此得非魄兆
先知乎無以寄悲情作哀詞三章今載於是以附奠文其一
云八月涼風吹白幕寢門廊下哭微之妻孥親友來相弔惟
道皇天無所知其二云文章卓犖生無敵風骨精靈沒有神
哭送咸陽北原上可能隨例作埃塵其三云今生豈有相逢
日未死應無暫忘時從此三篇收淚後終身無復更吟詩嗚
呼微之始以詩交終以詩訣絃筆兩絕其在今日嗚呼微之
三界之間應不生滅四海之內誰無友朋然以我爾之身爲

終天之別既往者已矣未死者如何嗚呼微之六十衰翁灰
心血流引酒再奠撫棺一呼佛經云凡有業結無非因集與
公緣會豈是偶然多生已來幾離幾合寧無後期公雖不歸
我應繼往安有形去而影在皮亡而毛存者乎嗚呼微之言
盡於此尚饗

香山全集

祭獨孤常州文

唐權德輿

維貞元二十年歲次甲申十一月戊申朔禮部侍郎權德輿
謹以清酌庶羞之奠敬祭於故常州刺史獨孤憲公平十四
丈之靈嗚呼德充而位不配才大而年不遐稽於賦命從古
太息伏惟蘊大雅之愷悌遵六二之直方作爲文章律度當

世燦如日星炳若龜龍施於政事表率萬國一郡洽和四方
鼓舞而不得宏志業歿於中年豈洪鈞造知便才命相盪
先師罕言末如之何伏以夫子篤忘形之契小人展無容之
敬去世二紀清風凜然故以息女歸公愛子雖不獲逮事而
備承家法况茲菲薄實忝眷私辨方之年違難於江徼志學
之歲伏謁於郡齋典司禮職掌奉易名之義嚮仰德門令承
合姓之重話言誘掖造次難忘德容碩姿髣髴在目自爲聲
舉之舊今則潘楊之歡諸孤純孝遺烈鍾羨鮮原改卜日月
有時酒殽靜嘉式薦靈位尙饗文苑
英華

祭獨孤常州文

唐

崔祐甫

維大歷十二年歲次月日外從祖舅朝散大夫權知中書舍
人賜紫金魚袋崔祐甫遣表妣前鄧州南陽縣尉李綜以清
酌之奠祭于從外孫甥常州獨孤使君至之之靈往矣至之
此時何時空原拱木荆榛狐狸林風月露以之增悲子之往
也高格遠量秀氣茂姿亡兮何若有兮誰對豈流蘇寓馬從
之已而嗚呼哀哉王事適我政事一埤益我在籠而不能求
其釋獨有懷君之淚臨秋風而自滴平生相期聊復一叙一
以豁胷中之憤氣二以簡明靈而晤語吾與至之思弘道義
自家刑國張維舉墜吾與至之思敦交好平居琢磨遇死赴
蹈吾與至之思邁純德言爲士准動有時則吾與至之思全

高節風雨如晦嚶嚶不輟吾與至之思闡斯文不俾臯契獨
暮華助吾與至之談空覈玄夢蝶喻筏去之蕭然吾與至之
期諸晚歲偃卧山樊同披薜荔舉其大較良難名數念我交
情千枝萬縷霜風掃葉或散或聚萬化紛然同歸野土向之
所務孰云其主嗚呼哀哉爛然澄醑平昔共歡如何此奠取
象於觀我思此飫子必吾劇自想道周暫留徒御所可懷者

徐生之絮

文粹

祭尹師魯文

宋歐陽修

嗟乎師魯辯足以窮萬物而不能當一獄吏志可以狹四海
而無所措其一身窮山之崖野水之濱猿獠之窟麋鹿之羣

猶不容於其間兮遂卽萬鬼而爲鄰嗟乎師魯世之惡子之
多未必若愛子者之衆而其窮而至此兮得非命在乎天而
不在乎人方其奔顛斥逐困死艱屯舉世皆寃而語言未嘗
以自及以窮至死而妻子不見其悲忻用舍進退屈伸語默
夫何能然乃學之力至其握手爲訣隱几待終顏色不變笑
言從容死生之間旣已能通於性命憂患之至宜其不累於
心胸自子云逝善人宜哀子能自達予又何悲惟其師友之
益平生之舊情之難忘言不可究嗟乎師魯自古有死皆歸
無物惟聖與賢雖埋不沒尤於文章焯若日日子之所爲後
世師法雖嗣子尙幼未足以付托而世人之庶可無於墜

天子於衆人最愛予文寓辭千里侑此一樽冀以慰予聞乎

不聞尙饗

文忠公集

西京應天禪院奏告太祖太宗真宗皇帝御容祝文

宋

王安石

伏以殊庭有血館御如存吉日旣蠲繕修惟謹式陳嘉薦以

妥明靈

李通志

西京應天禪院圻修太祖神御殿祭告祝文

王安石

廟綽有嚴威神所御將改新於寶構承欽奉於辟容仰冀靈

明俯垂鑒祐

同上

奏告永裕陵祝文

宋蘇軾

國家推本漢儀立郡國之廟參用唐制就佛老之祠乃眷洛
都載瞻園寢並興靈宇以奉神嬉閔惟冲人恭蹈成憲謹擇
良日臨遣近臣庶回日月之光少荅人天之望

東坡全集

西京應天禪院會聖宮奉安神宗皇帝神御祝文

蘇軾

於皇在天丕冒下土矧此山陵之近顧瞻兩都宅於嵩洛之
間上聯五聖有嚴淨宇祇奉睟顏願追梵釋之遊永荅人天
之望

同上

祭富鄭公文

宋蘇軾

元豐六年歲次癸亥十一月壬寅朔十九日庚申奉議郎
監汝州鹽酒稅輕車都尉賜緋魚袋程顥謹遣外甥張敷以
清酌庶羞之奠敢昭告於太尉文忠公之靈嗚呼粵稽古昔
得全實難惟夔契出乎唐虞之際而姬呂位乎文武之間其
餘雖有鉅賢碩輔僅或濟一時之險艱真儒大聖多處非其
位而孤鶩孰如我公道行乎重熙累洽之運而身享乎尊富
安榮之完事繫天下之重位極人臣之班生逢四世皆上聖
之主時歷七紀膺太平之安勲業揭乎日月聞望塞乎天淵
優游里第者猶十有三年於人之職可謂無負在天之理亦
爲曲全然而捐館之日遠近聞之孰不齋咨而涕漣尙以公

之沒也爲有憾焉嗚呼世之常態苟於自便終始之節艱於
承肩屏伏者以憂責不及而怠懈休老者以血氣旣衰而志
遷惟公年彌高而志愈厲身久退而誠益堅惟是愛君憂國
之道極晝夜之拳拳迨乎瞑目之旦屬纊之前萬物已莫累
乎心胸而朝廷之念獨有進乎昔日之當權宜乎易名之謚
典號爲撫實祭冊之聖詔極於哀憐則士大夫以公之沒爲
憾者蓋非偶然顛愚不肖辱公禮遇顧相期於義理非見私
於趨附公薨於洛賤居在汝官守有制欲往無路殮不望棺
塋不臨墓引領西風悲慟何數誠寓鄙文禮陳菲具恭祭道

周後期無所嗚呼哀哉

二程
全書

祭朱給事公揆文

宋程頤

嗚呼道旣不明世罕信者不信則不求不求則何得斯道之
所以久不明也自予兄弟倡學之初衆方驚異君時甚少獨
信不疑非夫豪傑特立之士能如是乎篤學立行至於沒齒
志不渝於金石行可質於神明在家在邦臨民臨事造次動
靜一由至誠尙論古人豈易其比蹇蹇王臣之節凜凜循吏
之風著見事爲皆可紀述謂當大施於時必得其壽天胡難
堪遽止於此嗚呼哀哉不幸七八年之間同志共學之人相
繼而逝今君復往使予踴躍於世憂道學之寡助則予之哭
君豈特交朋之情而已邗山之陽歸祔先宅思平生之深契

痛音容之永隔陳薄奠以將誠庶英靈兮來格

二程全書

祭劉博士質夫文

宋程頤

嗚呼聖學不傳久矣吾生百世之後志將明斯道興斯文于
既絕力小任重而不懼其難者蓋亦有冀矣以謂苟能使知
之者廣則用力者衆何難之不易也游吾門者衆矣而信之
篤行之果守之固若子者幾希方賴子致力以相輔而不幸
遽亡使吾悲傳學之難而所以惜子者豈止從游之情哉茲
焉歸塋不克臨穴姑因薄奠以敘其哀

同上

祭李校書端伯文

宋程頤

嗚呼自予兄弟倡明道學世方驚疑能使學者視傲而信從

子與劉質夫爲有力焉質夫與子爲外兄弟同邑而居同門而學才器相類志尙如一子謂二子可以大受期之遠到而半年之間相繼以亡使予憂事道者鮮悲傳學之難嗚呼天於斯文何其艱哉官制有拘不克臨穴寄文爲奠以敘其哀

代父祭呂申公文

宋程頤

嗚呼公稟則異得天之粹邁茲昌辰出爲嘉瑞生而富貴處之無累幼而聰明充之能至學旣知真仕則爲道出入屢更險夷一操二聖臨御人望是從起藩入輔命相在公平日視公靜默恂恂國論所斷一言萬鈞謂公無位位爲相臣謂公得志志存未伸然公心如權衡所以無間言於率土德如山

嶽所以致敬心於人主從容語默之間人孰量其所補胡上天之不弔不一老之愁遺淵水無涯將孰求於攸濟百身莫贖爲有識之同悲嗚呼哀哉羸老餘生辱知有素二男論忘勢之交不偶無酬知之路阻臨穴以伸哀姑託文而披露想英靈兮如在鑒丹誠而來顧

同上

祭范忠宣文

宋陳瓘

昔文正公在仁祖時忠於謀國衆正所依心虛而明照了不疑先事而慮有如蒼龜兩遭物謗益奮不移外禦元昊數蹈禍幾國勢旣安奚恤我危考公行事允也似之安不擇地難不敢辭至於言兵則曰不知豈曰爲異各遵其事不述其跡

是乃無違三年遠改生事者誰蔡相南行公獨救之一勝一
負其兆在茲公可以默又進忱辭人亦有言公爾忘私孰能
臨義舍安取危一斤四年盲廢始歸天子哀憐使命涕洟其
心不育意欲有施人願公留爲帝龍夔病不能對人所嘆
天子曰吁疾尙可爲錫以上劑臨遣國醫丁寧訓飭速速勿
遲云何不淑竟止於斯嗚呼哀哉公果已矣舉世思公公不
來矣人之於公有合有睽聞公之歿睽者亦悲情隔生死公
論乃出悲公之人始自今日臨終不昧忍死有述小其一身
大我王室置小恤大自初訖終可使聞者勸而作忠太宗征
賊奮嶽不忘心之所慮奚獨一方願借生靈願合朋黨願爲

宣仁一洗誣謗願正其事願辨其人願以中道行帝之仁嗚呼哀哉言惟心聲孰無此聲孰有此誠神器雖大如人之形愛養胃氣可以保生陽明之經徧于四體呼吸之間無有不差左絡連右首脉應趾中經流行寧有定位彼執一者棄異取同異我日偏同我日中語各有心心各有物孰能審是而不彼恤公獨有言繼者誰乎公薨我悲豈緣葭苧公昔南遷我在北陲側身以望心往從之及公之還我有言責陳留雖近欲往不得平生想慕獨未識公見公之心何必形容文正歿後公又亡矣仲季方與公復有子其門益大其道益光公

可無憾我亦奚傷

宋文鑑

原书缺页

原书缺页

祭李校書端伯文

宋 呂大臨

嗚呼自予兄弟倡明道學世方驚疑能使學者視倣而信從
子與劉質夫爲有力焉質夫與子爲外兄弟同邑而居同門
而學才器相類志尚如一予謂二子可以太受期之遠到而
半年之間相繼以亡使予憂事道者鮮悲傳學之難嗚呼天
於斯文何其難哉官制有拘不克臨穴寄文爲奠以敘其哀

謁杜工部祠文

宋 王十朋

風雅頌息嗣之者誰後代風騷先生王之讀書萬卷蓋欲有
爲明光三賦烜赫一時致君堯舜卒不克施此志蕭條乃昌
其詩天欲其鳴窮之使悲復生太白如墳應箎流落劔南厥

聲益馳暮年制作莫多於夔詩史有堂遺像有祠光燄照人
膏馥滿碑歌蜀道難誦杜鵑詞忠不忘君先生是思

王梅溪集

祭閻子與先生文

明白良輔

嗚呼自有宋迄今歷數百年矣吾洛自程氏兄弟倡明道學
之後其有志於起而繼之者駸駸乎其不絕如綫子與乃以
剛方之資卓絕之見獨能奮起於數百年之下欲以私淑之
學上續旣絕之統志堅金石老而不渝誠所謂廻狂瀾於旣
倒障百川而東之者歟子與當垂髫之際游業鄉校清淑頽
異迥出衆人日記萬言迎耳卽悟其講論也已不泥於文字
而必究諸義理之實其爲文也已不羈於詞章而必根諸道

義之正重然諾出詞氣威重老成尤有成人之器近而鄉黨朋友遠而鄰邑士夫莫不欲親德而願見之及冠聞文清薛先生講道河汾之間上繼周程張朱之緒負笈而往不遠千里遂獲究竟河圖洛書之秘太極通書之旨虛舟而往實腸而歸吾洛數百年不講之學賴子與復振可謂不世之傑矣歷官中外三十餘年到處有聲冰蘖一致屢有建明多所嘉尚其所著述悉皆正而不葩信而不詭且其孝弟之實已蒙旌著於朝可謂不愧神明不負所學矣良輔相與爲友歲將三紀書無不講理無不究德焉無不告過焉無不規正欲相與刮磨淬礪矯揉變化期以底於大成乃今忽焉而疾倏焉

而亡嗚呼世之論人者必舍其大而疵其細非論人之善者
也世之取友者每因其勢而畧其大非取友之善者也吾與
子與非因其勢而今特取其大哀其年未中壽志未底於大
成嗚呼斯文而止於是乎天何厚其與而畱其壽如是乎六
籍四書吾復與誰究乎圖書子史吾復與誰講乎爝火雖明
吾何復覩日月之貞乎溝壑雖深吾何復見江漢之大乎蟻
蠛雖聲吾何復聆雷霆之震響乎振俗學之委靡闢異端之
虛寂昔朱子哭蔡季通爲參同契之未及寃吾之所以哭子
與者抑奚但參同契一書之未寃哉浩浩乎剛正之氣凜凜
乎不屈之節屹屹乎出衆之見舉一世而不能移之才周子

用惜乎未及大子施嗚呼交誼無窮天數有限斯道未底於大成者果人乎哉昔在孔門有結纓而斃者有易簣而斃者蓋皆其正也子與而今已得其正矣亦何憾焉嗚呼遺稿俱存琴書在目惜乎所著周易詳說未及傳世撫膺而哭潛然一奠九泉有知其尙聆吾之言而鑒吾之哭

舊志

祭西川尤先生文

明

孟化鯉

於乎先生已矣泰山頽梁木壞矣化鯉小子失所瞻依矣化鯉受先生教育恩非筆楮可旣乃以筮仕羈在京國不克奉遺教視含殮聞日月有期將安厝嵩邨瀍穀間佳城矣又不克從二三子後築塋塚上一寫此心之哀終天抱恨復何言

復何言追憶嘉靖甲子化鯉候試洛城時未知向學先生與
二三子坐講化鯉漫游階下花竹間先生憫之曰噫恁好資
性顧不知事學耶化鯉竊聞之脉脉心動茲教育之始也越
明年乙丑夏因夜卧不得寐輾轉床席偶念及此學以謂人
生决無隨俗混過可以爲人之理亦無有罔所師承此念可
久而弗渝者賴表兄李伯生氏先容晉謁先生北面受學焉
十六年於此矣十六年間雖未嘗時時待函丈然侍之矣或
二三日或五六日或十餘日聆真切之教發蒙撒鄙未易縷
數也化鯉每告歸拜別先生必囑之曰子歸而有疑難處感
契處不妨筆出相證化鯉因條書請批駁求是正今昭昭簡

冊手澤尙新未易縷數也先生未嘗漫爲應酬文字會意直書率關道要卽不得已應酬莫非闡揚此學每以示化鯉受讀卒業必手錄焉藏有多矣矣未易縷數也蓋先生之學化鯉雖未窺其涯涘然沉渾純粹理道洞徹大要以孔門求仁爲宗而私淑於近世王文成致良知之訓所著擬學小記真足以接姚江沂濂洛探洙泗而開斯人之蒙瞶是以居邑濟濟景從心悅誠服延及衛北滇南亦有負笈來學者詎直化鯉親炙之已哉始化鯉謁先生先生語之曰學問無他在毋自欺他日曰陽明先生說致良知最盡頃年有慨於世之學者動輒談及元虛要眇之鄉以爲入微而考其躬行則不逮

故惓惓勉以職分見在處用工而曰孔門不輕言性命但說
職分攷諸論語可知也蓋爲道懇切成已成物因時立方揀
藥我人心獨苦矣化鯉荷教育深矣至矣先生之恩殆罔極
之恩而化鯉不得爲慎終之報抑將何以爲情耶昨家君遣
僕來京化鯉尙問先生安否忽得訃音未知所措已爲位哭
奠載遣家僮孟在賚誄語代叩靈几遙遙千里祭猶未祭於
私衷實不盡千百之一也先生其鑒化鯉之誠哉

孟雲
浦集

春秋祭孟雲浦先生文

明 呂維祺

於戲世衰道微功利競起道學不明人心幾死狂瀾旣倒誰
爲之砥先生毅然師尤夫子振衣千仞中立不倚自作秀才

以及出仕司權何染素銓奚詭其骨若山而心如水攫鱗補
牘策蹇歸里研硃點易閉門讀史萃厥羣英與譚名理時習
而悅遯世不悔洙泗遯源伊洛濟美由孔子來三千餘禩不
絕如綫幸賴有此淑我後人挾其肯綮如病斯藥錫以圭卮
如田斯耕授之耒耜遺範猶存高山仰止瞻焉念之無隱乎
爾私淑之心其敢窳_皆時維仲春秋愈巖顧諟敬束鬱金載
陳甘薺其意綦誠而物則菲神之格思永言佑啓洪河長流

高高孤峙

明德先生文集

瘞枯骨祭文

明呂維祺

有明天啓歲在癸亥暮春旣望呂子遊於城西郁山之坪桃

花夾岍柳色弄青其樂只且歸自澗水之濱載過芝山之墟俗所謂馬槽溝也長楊深莽紆迴傾欹幾長里許呂子視之其中堆骨纍纍然也或曰是古塚髑髏或曰是前數年戊午巳未之間大荒餓殍寄於淺土而以城工剝者或曰是道死無歸烏雀螻螿食其肉血而餘焉者呂子愀然不樂下馬悲咽已命童子負畚鍤担筐市蓐而瘞之慕容山之麓三日而畢爲文弔之曰於乎此溝壑之遺者其誰氏之父母兒女耶今耶古耶男耶婦耶曠彼中野胡不安厥土耶爾知其困楚否豈果不以南面之樂易生人之苦乎於乎其誰王者耶君子以萬物爲一體愴爾生之不辰痛我心之如割其坦周道

也其近郭也豈豈無聞且見者哉而豈其樂之也嗚呼痛哉
豈前之因與而死之屯也爰卜爾穴用寧汝魄睠爾暴露永
斯安宅吁嗟呼世之仁人長者其將諗此心而廣之俾無屯
澤也哉

同上

祭倉頡氏文

國朝張漢

天亶聰明爲黃帝史觀鳥獸跡始制文字滬水效靈神龜叶
異雨粟泣鬼靈感天地萬世文章於焉克嗣

祭夏直臣文

張漢

舍生取義殺身成仁危言敢諫炮烙就刑商場表墓直道昭
明三代首忠百世儀型聞風興起代有直臣

祭三程夫子文

張漢

自生民以來天生大聖人有數生大賢亦有數生大聖人於一家父子兄弟尤有數生大賢於一家父子弟兄亦有數大聖人在一家有周文王武王周公尙已生大賢在一家河南三程夫子亦曠世一遇嗚呼何其盛也於惟三夫子上接文王武王周公孔子千百載欲絕之傳下啟朱子而道明於世其學醇德粹功在六經洵百世之師也漢來守是邦躬親謁墓碑石蕩然於是退而感愧議立三石用志不忘漢則尤不揣妄陋手書欸識且繫姓名於石側繚垣修祔次第舉行拜之餘纍纍三墳伯溫夫子峙其北二子秩然乎列左右

原书缺123--末